

# INUIT ATAQATIGIIT

## Inatsisartuni



UPA 2019/169  
7. maj 2019  
Sofia Geisler

**Attartortitsisup aningaasartuutit ilanngaatigereerlugit iluanaarutissaasa maanna 1,5%-iusut, Namminersorlutillu Oqartussani inissianik attartortut akilertagaasa ukiut pingasut ingerlaneranni atorunnaarsikkiartuaarneqarnissaannut, taarsiullugulu immikkut aserfallatsaaliinissanut atugassiissutitut inissiaqarfiiut immikkoortortaanniiginnarnissaannut Naalakkersuisut siunnersummik suliaqaqqullugit peqquneqarnissaannik siunnersuut. Aserfallatsaaliinissami aningaasat oqorsaatit pitsangorsarnerinut, matunut, igalaanut, qalipannernut assigisaannullu atorneqassapput.**

(Inatsisartuni ilaasortaq Aqqaluaq B. Egede, Inuit Ataqatigiit)

Aqqaluaq B Egedep qaqlitaata uuma itigartinneqarnissaanik amerlanerussusiineq tusaatissatut tiguarput.

Immikkoortup uuma siullermeernerani oqaatigeriikkatta saniatigut uku oqaatigerusuppagut.

Inissianik attartortittakkanik attartortut attartortunngorumaartussallu inissianik ullutsinnut naleqquutnik najugaqarfeqarnissaannik tamakkiisumik anguniagaqarneq soorluuna qaninnerulinngitsoq.

Inissiat ataasikkaat siornatigut oqummik ajornartorsiuteqarfiusimanersut pillugit attartortittakkanut ininut nuuttussanngornermi initaartussaq ilisimatissallugu piginnittut inatsisitigut pisussaaffiligaanngillat.

Inissianik attartorniartut itigartitsisinnaatitaanngillat, taamaaliorniarunik utaqqisunik peerneqarnissaq naatsorsuutigissavaat.

Init suut sorliillu siornatigut oqummik ajornartorsiuteqarsimanersut nalunaarsugaaneq ajorpoq, taamaattumik ilisimanngilarput init qassit qanga qanorlu annertutigisumik suliarisariaqarsimanersut oquk pissutigalugu. Tassungalu atatillugu Naalakkersuisut apererusuppagut aamma taakku isumaqarnersut inissiani oqummik ajornartorsiuteqarfiusunut tunngatillugu ajornartorsiut ingattajaarullugu saqqummiuttarneripput.

Aamma paaserusutatsinnut ilaavoq inissiat attartortittakkat najugaqarfigissallugit pitsaanngitsut pissutigalugit inissianut allanut nuukumasut ima amerlatigilersimanersut aallaat inissarsiorut nalinginnaasumik utaqqisuniittut suli sivisunerujussuarmik utaqqisariaqartalernerannik tamanna kinguneqarluni. Aamma tamanna ima kinguneqartarnersoq inissianut iserterniarnermi depositum-i tamakkerlugu akiliisinnaasut siullunneqartalersimallutik, uffa depositum naafferarlugu akilersornissaanut kikkulluunniit pisinnaatitaaffeqaraluartut?

Inissiat attartortittakkat ullutsinnut naleqquttut pilersinniarnissaannut aaqqissuusseqqinnermullu peqataassaagut, ullumikkulli killiffik ima ilungersunartigisutut ippoq, piaartumik iliuseqarnissamut alloriarnissaq kisimi attartortunit utaqqineqarluni.